

## MALANS

Arrestà in um  
cun tschintg kilos heroin

La fin da l'onn 2024 ha la Polizia chantunala dal Grischun controllà a Malans in um en possess da heroin. En il decurs da las retschertgas han ils ufficients chattà tar el totalmain tschintg kilos dal med narcotisant. Quai ha la Polizia chantunala communigà il mardi.

Il november 2024 è in burgais albanais da 58 onns vegni controllà a Malans. El aveva cun sai bundant 200 grams heroin.

La polizia ha confiscà heroin e cocain en valur da 200 000 francs. FOTO POLIZIA CHANTUNALA

A chaschun da las retschertgas èn vegnids chattads a Wil ulteriurs tschintg kilos da questa substanz sco er 70 grams cocain. Quai è gartegià cun agid da la Polizia chantunala da Son Gagl. La valur commerciala da las drogas destinadas per il commerzi importa passa 200 000 francs. L'um sa chatta en arrest d'inquisiziun, la procura publica dal Grischun ha disponi l'execuziun anticipada dal chasti. (cdm/fmr)

## CUIRA



L'emna passada è ina petarda explodida en la scola Giacometti a Cuira. FOTO RTR

Scolar da la superiura la culpa  
da l'explosiun cun ina petarda

Fatg explodir l'emna passada ina petarda en la scola Giacometti a Cuira ha in scolar da la scola superiura. Il delinquent haja pudì vegnir chattà ed il delict per gronda part sclerì, communigescha la Polizia chantunala il glindesdi. Tar l'explosiun en il suler da la scola suenter la pausa da l'avantmezdi eran vegnidas blessadas duas scolaras. 44 ulteriurs uffants avevan stui vegnir tractads en l'ospital pervia da problems cun l'udida. Ils uffants en la chasa da scola eran vegnids tgrads dad in team da salvament e dal servetsch psicologic. (rtr/fmr)

## LA CIFRA DAL DI

# 360 grams

charn da chaval per persuna vegn consumà durant in onn en Svizra. Quai tenor la pagina dad internet dal patrimoni culinar svizzer. Var 90% da la charn-chaval consumada en Svizra vegn importada. E: bundant dus terzs vegnan consumads en Svizra franzosa ed en il Tessin. (fmr/sb)



Il hotspot da la scena da drogas a Cuira: il Stadtpark a l'ur da la citad veglia. La nova droga fentanil n'è anc betg derasada en la scena grischuna, igl ha dentant gia dà singuls cas da substanzas che cuntregnevan fentanil. FOTO SOMEDIA

## La droga che fa tema er al Grischun

En ils Stadis Unids procura la droga sintetica fentanil per tragedias umanas. Ed entant sa preparan er ils chantuns svizzers per ina pussaivla derasaziun da questa droga ch'è uschè privlusa sco nagin'otra. Il chantun Grischun e la citad da Cuira èn vi da coordinar e trair mesiras.

RTR/FMR

Lentschatta da quest mais da favrer ha la citad da Turitg annunzià diversas mesiras per cumbatter opioids sintetics, en spezial cunter la droga fentanil (guarda boxa). Quai ha la citad fatg, suenter ch'ella aveva constatà a Turitg dus cas, nua che la substanz privlusa era vegnida maschadada cun autras drogas.

Tranter differentas mesiras duai la populaziun da Turitg vegnir sensibilisada, la tgira medicinala duai vegnir sviluppada ed igl è vegni producì «naloxon», in medicament d'urgenza che po gidar cunter ina surdosa da fentanil.

## Co guarda ora en il Grischun?

En il Grischun èn era gia vegnids constatads singuls cas da fentanil, nua che la substanz era vegnida maschadada cun autras substanzas. Cifras exactas na datti dentant betg.

Tuttina èsi per tut ils responsabels cler che baud u tard sa deras la droga sintetica er en Svizra. Actualmain na pon ins dentant anc betg discurre dad ina gronda derasaziun, ha declerà Marcus Caduff ad RTR. Il responsabel per ils fatgs socials dal chantun Grischun ha però tuttina rendì attent: «I fa en mintga cas mal il venter, sch'ins vesa ils maletgs da citads pertutgadas. Il svilup en il Grischun na vegn betg ad esser blier auter che en il rest da la Svizra. Il tema vegn adina pli virulent, quests opioids sintetics han in grond potenzial da far in donn immens. Ins sto pia far quint che la droga sa derasia adina pli ferm, era en Europa e surtut sur il martgà nair.» Perquai stoppia il chantun Grischun sa preparar da cuminanza cun auters chantuns ed ensemen cun diversas instituziuns per il mument che la droga cuntanscha il pajais ed il chantun.

## «La droga fa mal il venter»

Era la citad da Cuira sa fa quitads pervi da la nova droga sintetica, sco ch'il regent Patrik Degiacomi, responsabel en la chapitala grischuna per dumondas en connex cun la scena da drogas, ha sincerà envers RTR: «La droga fa mal il venter a las personas dependentas, ma er a las autoritads da la citad ed a tut la societad. Nus stuain propi examinar la chausa da rudent e decider mesiras. Quellas stuain nus però coordinar bain cun il Chantun.»

Tenor il president da la regenza grischuna, Marcus Caduff, ha il chantun Grischun en mira tschintg mesiras ch'ins vul ussa intensivari: «Nus essan vidlonder dad investir tar la prevenziun, tar la sensibilisaziun e tar l'infurmaziun en ils circuls pertutgads. Ultra da quai vulain nus era promover da testar drogas, per consta-

## Fentanil – blier pli ferm che heroin e morfin



Dus milligrams fentanil – ina dosa uschè gronda sco in piz dad in rispli – pon esser mortals. FOTO US DRUG ENFORCEMENT ADMINISTRATION

Fentanil è atgnamain in med encunter il mal, igl è dentant in analgetic narcotisant fitg ferm. Atgnamain èsi in med opioid che vegn duvrà en la medischna suenter grevas operaziuns ubain tar pazients da cancer en il stadi final. Fentanil fa vegnir spert dependent, perquai che la substanz ha in effect ch'è 50 giadas pli ferm che quel da heroin e 100 giadas pli ferm che quel da morfin.

En ils Stadis Unids ha la droga gia chaschunà plirs 100 000 morts. Perquai è la droga vegnida classificada en ils USA sco ina da las drogas las pli mortals. Gia mo ina dosa uschè gronda sco in piz dad in rispli (2 milligrams) po esser mortala.

Fentanil sa lascha producir fitg simpel e custa pli pauc per la produziun che autras drogas. Perquai è la droga fentanil daventada attractiva sin la fiera. La substanz vegn savens dentant era nizzegiada per stender autras substanzas. (rtr/fmr)

tar sche quellas substanzas cuntregnan fentanil u betg.» E sco tschintgavla mesira èn ins – tenor Marcus Caduff – era vidlonder d'organisar il «cuntramed en cas da surdosas», vul dir in medicament sco «naloxon» per pudair reagir en cas d'urgenza.

## Forsa laschar la detta

Gist tar il uschenunnà «drug-checking» vesa il regent da Cuira, Patrik Degiacomi, ina pussaivladad per cumbatter la derasaziun da fentanil. Cun quel test pon persunas dependentas laschar analisar ina substanz sin la droga sintetica u silmain sin la quantitat da quella – e tut tenor laschar la detta da la substanz.

Sin las localitads da consum, planisadas en la chapitala grischuna, n'ha la smanatscha per ina derasaziun da fentanil anc betg in'influenza. Questa smanatscha na vegn era betg ad accelerar l'installaziun da quel center. La construcziun da quel dependa al mument anc da proceduras giuridicas.

«Nus essan vidlonder  
dad investir tar la preven-  
ziun, tar la sensibilisaziun  
e tar l'infurmaziun en  
ils circuls pertutgads.»

Marcus Caduff,  
president da la regenza grischuna